

FACTVM

POVR DOM PLACIDE ROVSSEL,
Prieur de l'Abbaye Sainct Germain des Prez, Or-
dre S. Benoist, Congregation S. Maur: Et Dom
Robert Quatremaire, Religieux de ladite Abbaye &
deffendeurs.

Les Religieux Benedictins de ladite Congregation S.
Maur interuenant, & incidemment demandeurs.

CONTRE

MAISTRE GABRIEL NAU DE MEDECIN,
& Prieur Commendataire del' Artige, Ordre de S. Augustin: de-
mandeur & deffendeur.



Era obserué s'il plaist à la Cour, que ledit sieur Nau-
dé pretendant que le Liure composé par ledit D. Ro-
bert, pour la deffense de Iean Gersen Abbé de Ver-
ceil dudit Ordre S. Benoist, Autheur desdits li-
ures, DE IMITATIONE CHRISTI, luy est injurieux;
à cause qu'en iceluy est impugnée vne pretenduë
Relation dudit Naudé, touchant l'examen qu'il dit auoir esté fait
à Rome en l'année 1641. de certains Manuscrits, dont les Bene-
dictins se sont seruis pour attribuer ledit liure DE IMIT. CHR.
audit Iean Gersen son legitime Autheur: Et lesquels Manuscrits
par cette pretenduë Relation, ledit Naudé pretend auoir esté fal-
sifiez; a presenté Requeste au Preuost de Paris, ou son Lieute-
nant Ciuil, le

1650.

tendant à ce que tous les exemplaires dudit liure, composé
par ledit Dom Robert, soient saisis, & deffenses à tous Librai-
res de les exposer en vente & debiter, & que Dom Robert qui en
est l'Autheur, & lesdits Placide Roussel son Superieur pour auoir
permis ladite impression, seront assignez pour eux voir condamner
à luy faire reparation d'honneur, pour les pretenduës injures pro-
ferez par ledit D. Robert & couchées dans fondit liure, & autres
peines y portées. Sur laquelle Requeste ayant esté mis sans co-
gnoissance de cause & sans parties appelées, soit fait ainsi qu'il est

2
requis. Et ensuite ledit liure ayant esté faisi, au fins de ladite Re-
queste. Ledsits Religieux auroient icelle instance faict renvoyer
aux Requestes du Palais; Et comme par ladite Requeste ainsi que
dit est, présentée audit Preuost de Paris, il auoit offert de faire
aporter de Rome à ses propres frais & despens, lesdits Manuscrits,
& de configner mil liures applicables à l'Hostel Dieu de Paris,
pour estre aumosnez aux pauvres, en cas qu'il ne iustificast par la re-
présentation d'iceux qu'ils sont falsifiez; Icelles offres ayant esté
acceptées par lesdits Dom Placide Roussel Prieur, & Robert Qua-
tremaires, & l'affaire ayant esté portée à l'Audiance sur la requeste
qu'il en auroient présentée à ladite Cour. Ledit Naudé qui ne s'e-
stoit serui de ses offres specieuses, que pour surprendre la religion
des Iuges, se voyant pris au mot, sçachant bien que lesdits Ma-
nuscrits estoient veritables & non falsifiez; & que par la repre-
sentation d'iceux ils seroient iugés tels, pour aucunement se
dégager de la calomnie par luy imposée, tant au R. P. Dom
Constantin Caietan Abbé & Religieux Benedictin, dont le nom est
en veneration, à cause de sa grande pieté & erudition, qu'à tout
l'Ordre de S. Benoist. Il auroit lors de la plaidoirie de la cause sou-
stenu que lesdits Manuscrits deuoient estre apportez à la diligen-
ce, frais & despens desdits Peres, seignans qu'ils estoient en
leur possession & dans la Bibliothecque Anicienne à Rome, & non
en sa disposition: pretendant par ce moyen se retraicter de sesdites
premieres offres; nonobstant quoy par Sentence de ladite Cour
du

Septembre 1650. Il auroit esté ordonné que le-
dit Naudé feroit apporter de Rome à Paris dans trois mois à ses
frais & despens lesdits Manuscrits en question: ce que n'ayant fait
apres cinq mois écoulés, & voyant que les Religieux Benedi-
ctins de ladite Cōgregation de S. Maur, auroient présenté requeste
à ladite Cour le 13. du mois de Fevrier an présent 1651. pour estre
receus parties interuenantes en l'Instance desdits Doms Placide
Roussel, & Robert Quatremaires, & ledit Naudé s'estoient ren-
dus incidemment demandeurs à l'encontre de luy pour les calo-
mnies & injures atroces & scandaleuses par luy couchées, tant
en sa declaration, que Factum, qu'il auroit donné au public, con-
tre ledit Abbé Constantin Caietan, & contre tout l'Ordre S.
Benoist, & conclud à ce que tous les mauuais discours & paro-
les iniurieuses contenuës esdites Relations, Factum, & autres es-
crits dudit Naudé, seront supprimez, rayez & biffez: deffenses
audit Naudé de plus tenir de semblables discours, & de plus es-
crire telles impostures contre l'honneur & repuration desdits

Abbé Caietan & Benedictins, à peine de trois mil liures d'aman-
de applicable au pain des prisonniers, & pour l'auoir fait, con-
damné en telle reparation qu'il plaira à la Cour ordonner, & en
tous les despens. Pour aucunement se mettre à couuert desdites
demandes en reparation, & du rapport & exhibition desdits Manus-
cripts, il auroit le lendemain 13. dudit mois de Fevrier, par sur-
prise & en l'absence de l'Aduocat desdits Peres Benedictins, &
desdits D. Placide & Dom Robert, fait appeler la cause & remon-
stré que quelque diligence qu'il auroit peu faire à Rome, il n'au-
roit sceu recouurer lesdits Manuscrits, & supplié la Cour de le
descharger de la condamnation contre luy renduë du rapport &
exhibition desdits Manuscrits. Mais comme la Cour auroit bien
reconnu que ce n'estoit qu'une inuention affectée dudit Naudé,
pour eluder l'effect du Iugement contre luy rendu sur ses offres,
portant ladite condamnation de faire venir de Rome à Paris les-
dits Manuscrits dans trois mois, qui estoient passez desle

Decembre dernier, & éuiter la reparation con-
uenable ausdits Peres Benedictins qu'il a faussement calomniez,
elle auroit par sa Sentence dudit iour 14. Fevrier ordonné de-
rechef que ledit Naudé feroit venir à ses frais & despens lesdits
Manuscrits en question, & iceux représenteroit dans trois mois
pour toute prescription & delay, autrement ledit temps passé seroit
fait droit ausdits P.P. Benedictins ainsi que de raison.

Et jaçoit que le seul acquiescement desdits Peres, pour la repre-
sentation & exhibition desdits Manuscrits soit vne preuue suffi-
sante de leur innocence, & de l'integrité desdits Manuscrits, com-
me au contraire le manquement d'auoir esté rapporté par ledit
Naudé suiuant ses offres, soit vne entiere conuiction contre luy.
Toutefois, pour faire voir & iustifier à la Cour plus euidentement,
que le dit Naudé est mal fondé en sa demande & reparation, & que
la faisie faite du liure dudit D. Robert, & l'ordonnance dudit Pre-
uost de Paris est injurieuse, tortionnaire & desconuenable; que main-
leuée en doit estre faite, avec reparation, dommage, interêts &
despens: & que lesdits Peres Benedictins interuenans, sont bien
fondez es conclusions par eux prises en l'instance contre le-
dit Naudé. Elle est bien humblement suppliée de prendre. Que
question s'estant agitée en France en l'année 1641. entre les Re-
ligieux Benedictins de la Congregation de S. Maur, & les R.R.
PP. Chanoines Reguliers de l'Ordre de S. Augustin, de l'autre,
touchant le veritable Autheur des Liures DE IMITATIONE CHRISTI;
Ceux là l'attribuant à Jean Gersen Abbé Benedictin, & ceux cy à

Thomas de Kempis Chanoine Regulier de S. Augustin.

Entre autres moyens irrefragables, dont se seruent lesdits Benedictins, sont plusieurs Manuscripts iusqu'au nombre de trente deux qui ont esté reconnus tant en France, Allemagne, qu'Italie. Desquels les vns marquent vn temps plus ancien que Thomas de Kempis, les autres declarent par veritables inscriptiōs, le nom, surnom, profession & dignité de l'Autheur, du nombre desquels, trois ont esté trouuez en diuers Monasteres d'Italie par ledit R. P. Dom Constantin Caietan autrefois Visiteur de la Congregation du Mont-Cassin: & vn autre dans la Bibliotheque du Cardinal Bichi qui luy auoit esté donné par le sieur Leone Allatio domestique iadis dudit Cardinal, & maintenant du Cardinal Barberin; par le moyen desquels Manuscripts ledit Constantin à prouué si euidentement quel'Autheur des liures de question est Iean Gersen Abbé, que lesdits Chanoines n'ayant eu moyen de les contredire pendant plusieurs années, enfin se sont auisez de vouloir faire passer lesdits Manuscripts pour auoir esté falsifiés, & à cet effet se feroient seruis d'une fable faite à plaisir par ledit Naudé, sous le nom de Relation de ce qui c'est passé à Rome dans l'examen desdits Manuscripts en l'an 1641.

Voicy ce que porte en somme cette pretenduë Relation.

Le Cardinal de Richelieu voulant faire imprimer au Louure le Liure, DE IMITATIONE CHRISTI, fut prié par les Benedictins de Paris de ne le pas faire sous le nom de Thomas de Kempis, mais de Iean Gersen, Abbé de Verceil, comme le tesmoignent certains Manuscripts gardeZ à Rome. Le Cardinal promit d'acquiescer à leur desir; pourueu qu'ils luy fissent voir par tesmoignages authentiques la verité des Manuscripts. Alors les Benedictins de Rome prièrent le Cardinal Baigne d'examiner les Manuscripts, & d'en dire son sentiment, ce qu'il accepta; & pour proceder plus juridiquement, il iugea à propos de nommer deux hommes experts en cette matiere qui les examineroient en sa presence, & deposeroient pardeuant un Notaire, & en presence de tesmoins ce qu'ils en auroient reconnu & Naudé, Florauant Marinelli furent nommez examinateurs par ledit Cardinal. Les Manuscripts estans apportez, Naudé les prit & emporta en sa chambre, ou les ayant tenus & feuilleté tout seul quelque espace de temps, il les reporta au Cardinal, disant qu'il y auoit trouué de la falsification. Le Cardinal voulut que cecy fust communiqué à Florauant, & qu'on s'en rapportast à son iugement. Naudé remporta les Manuscripts en sa chambre, & les tint encore tout seul quelques heures. Pendant lequel temps, voicy venir à l'improuiste un nommé Vincent Galleot; qui iettant la veüe sur l'un desdits Manuscripts, sans se douter d'aucune tromperie

tromperie leut au Frontispice, THOMAS, & non pas IOANNES, tant estoit grossier l'artifice par lequel on auoit effacé THOMAS, & escrit IOANNES en sa place. Ensin sur le soir s'en vint Florauant en la chambre dudit Naudé, & ayant veu les inscriptions & souscriptions desdits Manuscrits, apres vne longue dispute qu'il eut avec ledit Naudé touchant la falsification, n'eut plus rien a luy repliquer.

Ce sont en abrégé les propres termes contenus en la pretendue Relation dudit Naudé; qui conclud non seulement que lesdits Manuscrits sont falsifiez: mais encore que ledit Constantin & autres Benedictins sont Autheurs desdites falsifications.

Pour refuter cette Relation faite à plaisir par l'ennemy de Constantin & del'Ordre S. Benoit, Dom Robert a opposé six moyens, chacun desquels contient plusieurs raisons conuaincantes.

Le premier moyen contre ladite Relation, sont les faussetez qu'elle contient, à sçauoir.

1. *Que le Cardinal de Richelieu & les Benedictins de Paris, voulurent faire decider la question par l'examen des Manuscrits de Rome, & que les Benedictins donnerent charge à Dom Placide leur Procureur en Cour de Rome, de faire examiner lesdits Manuscrits.* Cela n'est pas veritable: mais bien voulurent ils vuider la question par la dispute deuant des Arbitres, non à Rome, mais à Paris: Et en effet le Factum mesme de Naudé, dit que l'on prit des Arbitres, & que l'on aduertit les Benedictins, les Chanoines Reguliers, & les autres d'estudier cette question, afin de la pouuoir resoudre. Le P. Fronteau en conuient aussi en la Preface de sa defense pour Thomas K. Et il n'y a que trop de personnes dignes de foy qui en sont tesmoins. Mais Monsieur des Noyers qui deuoit Presider à l'Assemblée, ayant esté appelé ailleurs pour les affaires du Royaume, l'Assemblée proietée n'eut aucun effect. Ce qui fut cause que les Liures furent imprimez sans le nom d'aucun Auteur.

Si donc on auoit resolu de disputer à Paris, on n'auoit pas eu dessein de faire examiner les Manuscrits de Rome, & il n'y auoit point sujet de le faire; puis qu'outre qu'il y en a suffisamment d'autres sans ceux-là, personne iusqu'à lors n'auoit obiecté ladite pretendue falsification, pour donner lieu de les faire examiner à Rome; ains la verité d'iceux estoit assez connue & autorisée par témoignages authentiques, & Liures publics. D'ailleurs si les Benedictins se fussent offerts à cette preuue par l'examen desdits Manuscrits, il auroit fallu la faire en la presence desdits

Chanoines Reguliers, ou eux deuëment appelez, ou du moins lesdits Benedictins deuoient rapporter ladite preuue authentiquement faite par ledit examen, à faute dequoy on n'auroit pas manqué de leur faire perdre leur procez, & de faire imprimer lesdits Liures sous le nom dudit de Kempis.

Item Naudé dit en sa Relation: *Que dans l'un des Manuscripts, on auoit effacé le nom de Thomas, & escrit dessus le nom de Ioannes, avec vne si grossiere rature, que quiconque ne se fust donné de garde de fourberie, eust leu de premier abord Thomas, & non pas Ioannes.* Ainii qu'il dit estre arriué à Galleot.

Cette fausseté de la Relation se conuainc par la Relation mesme. Car si l'*imposture estoit si grossiere*, comment est-ce que le Cardinal Baigne ne s'en voulut pas fier à ses yeux: mais voulut qu'on s'en rapportast au iugement de Florauant? Comment Florauant en eust il disputé si long-temps contre Naudé. Et qui croira que si Constantin eust, ou connu, ou commis vne si honteuse & monstrueuse deprauation, il en eust permis l'examen public, & ce par le plus aspre ennemy qu'il ait iamais eu.

Cette fausseté se conuainc encore par l'examen que le R. P. Claude Morizet, & Felix Marconius Protonotaire Apostolique, ont fait desdits Manuscripts auparauant qu'ils tombassent es mains de Naudé; par lequel ils declarèrent authentiquement avec sermens pardeuant vn Notaire, en presence de tesmoins; *Qu'ils n'ont trouué aucune falsification esdits Manuscripts.* L'acte de leur tesmoignage est rapporté dans l'Apologie dudit D. Robert, pour conuaincre de faux la Relation dudit Naudé. De plus Naudé rapporte; *Que Dom Placide, & Dom Iean Benedictins, qui estoient à Rome, reconnurent les falsifications des Manuscripts, & que Florauant en tomba d'accord.* Tout cela est absolument faux, & ledit Naudé n'en a iamais pu rien iustifier.

Le second moyen que Dom Robert oppose à ladite Relation, sont les défauts des choses essentielles requises pour la rendre authentique.

Premierement estoit necessaire le signe de Florauant, lequel comme porte la Relation, auoit esté choisi & nommé examinateur avec Naudé, voire mesme estoit le principal examinateur, selon la mesme Relation, puisque Naudé ayant veu & fueilleté les Manuscripts, & ayant trouué de la fausseté, ainsi qu'il dit, & en ayant aduertie le Cardinal, ledit Cardinal ne s'en voulut point rapporter ny a ses yeux, ny a ceux de Naudé, mais *voluit vt Florauantis iudicio res eadem committatur*, voulut que l'affaire fut commise au iu-

gement de Florauant, par ce qu'il auoit beaucoup d'experience de iugement & de fidelité, & ainsi deuoit estre creu en son rapport. Or il conste par la Relation, qu'il disputa avec Naudé touchant la falsification pretendue, croirons nous donc qu'il ait acquiescé apres ces disputes, puisque luy mesme, au iugement duquel il s'en falloit rapporter, plustost que de Naudé, n'a pas voulu verifier cette Relation par l'apposition de son nom & signature. Secondement: Ou est l'acte authentique du Notaire, que ledit Naudé dit auoir esté choisi a cet effet? & ou sont les tesmoins? à quoy sert de rapporter par Naudé en cette belle Relation la moitié d'un acte du pretendu Notaire, contenant les tiltres & inscriptions desdits Manuscrits, mais sans le nom dudit Notaire, ny des tesmoins, sans date du iour & an, sans mention du lieu ou la chose se passa. Troisiemement. Et sur tout ou est la signature dud. Seig. Cardinal Baigne, deuant lequel ce pretendu examen à deu estre fait. Faut il croire audit Naudé seul, qui est partie, & qui tesmoigne tant d'animosité, & contre Caietan en particulier, & contre tout l'Ordre Benedictin? Si des pieces de ce calibre estoient receuës, chacun en trouuerroit assez pour gagner son procez.

Le troisieme moien contre ladite Relation est, que ledit Naudé pour autoriser sa pretendue Relation est allé mandier le tesmoignage d'un nommé Galeotus, & laissé là Florauant qui estoit examinateur desdits liures, ainsi que dit Naudé, voire mesme le principal, *Cuius iudicio res committi debuit*, qui est encore viuant, pour aller chercher à Rome ce Galeotus qui n'estoit point des Commissaires, & ce quatre ans apres la date de cette pretendue Relation, au dire dudit Naudé, qui croira à ce tesmoignage Florauant n'en disant mot, quoy qu'il conste qu'il en a long temps disputé avec ledit Naudé? Secondement ce Galeotus est non seulement trop suspect, mais encor absolument indigne de creance en ce rencontre, Naudé rapportant qu'ils estoient tous deux domestiques en vne mesme famille. Or les Loix appellent *Testem mutuum qui de accusatoris domo producitur*: par ce que *Clandestinis & domesticis fraudibus facile quid vis pro negotii opportunitate consingipote st, & id quod verum est aboleri*. L. Data. C. de Donat. Troisiemement Si Galeot n'auoit témoigné que d'un point porté dās la Relation, à sçauoir, *Que ledit Galeot entrant sans heurter en l'estude de Naudé, & iettant la veüe sur un Manuscrit, leut Thomas & non pas Ioannes*, Peut-estre eust il sauué l'integrité de son tesmoignage, quoy que d'ailleurs il ne soit receuable pour les raisons susdites. Mais cé qui rend suspect & le tesmoin, & le tesmoignage, & la Relation de

question, sont les termes dont il vse. *Fateor omnia quæ in presenti scriptura referuntur vera esse, & pro ut narrantur ita omnino peracta fuisse*, l'atteste que tout ce qui est contenu en cet escrit est veritable; & que les choses se sont passez tout ainsi qu'elles sont rapportées en ces paroles: il est cōvaincu par la Relatiō dudit Naudé, qu'il atteste mesme des choses qu'il ne pouuoit connoistre que par le rapport d'autrui, voire mesme du seul Naudé, & de plus encore des choses fausses.

Naudé rapporte plusieurs fauses suppositions que nous auons cy dessus éuentées. Entre autres qu'estant tout seul en son estude il examina & trouua les Manuscrits falsifiez. Naudé dit qu'il en disputa avec Florauant, & que ledit Florauant acquiesca à son Iugement. D'où sçait tout cela ledit Galeot, sinon parce que Naudé luy a dit? il se retrouue plusieurs choses semblables, dont Galeot rend tesmoignage. Que peut on dire ou penser d'un homme qui tesmoigne de ce qu'il sçait, & de ce qu'il ne sçait pas? n'est-ce pas un homme prest à tout faire pour agreer à son amy?

Le quatriesme moyen cōtre la Relation de Naudé sont les contradictions du mesme Naudé contre soy mesme, vrayes marques d'une personne qui ne parle que par passion, *& non intelligit neque quæ loquitur neque de quibus affirmat*. En la page 22. de son Factum il accuse quatre manuscrits de falsification: en la page 5. du même Factum, il n'en cote que trois, & dans sa Relation il n'en calomnie que deux. Et pour deuxiesme contradiction de Naudé contre Naudé en l'Apologie derniere pour Gersen par ledit Dom Robert page 202. & suiuanes, on a fait voir par les mesmes termes de la dite relation de Naudé qu'il n'y a aucun Manuscrit falsifié. Bien dauantage on montre que la mesme relation dont on se sert pour maintenir Thomas K. est fauorable aux Benedictins en faueur dudit Gersen. Troisiemement nous auons remarqué cy dessus que cette pretenduë falsification n'estoit point si grossiere comme Naudé a dit, puisque luy mesme dit en auoir long temps disputé avec ledit Florauant. Quatriemement ce pretendu Instrument de Notaire, duquel nous auons aussi parlé cy dessus, qui fauorise aux Benedictins, reconnoist l'écriture fort ancienne *antiquo caractere*, d'un ancien caractère: Naudé en sa Relation dit qu'elle est fort recente, *recens admodum*, d'un caractère fort recent. Cinquiemement, en cet instrument proposé par Naudé il est dit que la description des Manuscrits rapportee en iceluy est tres veritable, *veritati maximè consona*. Et Naudé en la mesme Relation

9

dit qu'elle est fausse: quelle creance donc dōnera-on à M. Naudé dans cette contrariété qui dit & se dedit.

Le cinquiesme moyen contre la Relation, sont les finesse & astuces dont on a vsé pour la mettre au iour. Car premierement on ne la produitte en public que plus de sept ans apres la mort du Cardinal Baigne, & pourquoy non dès la premiere annce 1641. lors qu'on imprimoit à Paris lesdits liures? N'est-ce point que Naudé craignoit que ledit Cardinal ne l'eust dementy. 2. Pourquoy ne la-t'on point produicte à Rome, ou ledit Cardinal, Florauant, ledit Notaire & autres qui auoient connoissance du fait estoient, & qui pouuoient en dire la verité? Pourquoy à Paris ou il ny a pas vn tesmoin oculaire que Naudé, qui estant la partie, veut aussi y estre receu pour tesmoin & iuge? Et à Paris mesme pourquoy n'y a-t'elle paru au iour qu'en 1649. Si Naudé estoit si zelé pour deffendre la verité, & satisfaire à sa conscience, comme il dit, pourquoy ne la mettoit il au iour dès cette mesme annce 1641. qui estoit le temps qu'on recherchoit le nom dudit Autheur? 3. Quedira-t'on qu'o aye fait imprimer cete pretenduë Relation, comme l'ayant tiree du 588. volume du Chartulaire de Messieurs du Puy où ledit Naudé pretend l'auoir enuoyé des 1641. (ce qui parroist manifestemēt faux.) Car à la Relation imprimée est iointe l'attestation de Galeot signee par le mesme Galeot à Rome l'an 1645. Or ce qui a esté déposé es mains de Messieurs du Puy en 1641. demeuré chez eux depuis iusqu'à l'an 1649. comme ils l'asiment dans leur tesmoignage que Naudé a ioint à son Factum. Comment donc ce peut il faire que ce qui n'a pas sorty de Paris depuis 41. iusqu'à 49. se soit trouué à Rome en quarente cinq? Iugez si on doit receuoir le temoignage de cet homme comme vn Oracle? 4. Il y a bien plus: car cette pretenduë copie enuoyee à Messieurs du Puy, ne s'y trouue plus, ayant esté rendue à Naudé par ces Messieurs en 1649. Quelle finesse est-ce cy de citer cette Relation comme ayant esté extraicte & collationee par Notaire du Chartulaire de Messieurs du Puy, & cependant on ne l'y trouue point, en ayant esté arrachée? Pourquoy tout cela? ne void on point euidement que Naudé ayant eu tōiours avec soy son pretendu Original, il y a pû changer & adiouster selon que sa passion luy aura dicté, iusqu'à ce qu'il l'a fait signer & collationner; & craignant que par apres on vint à cōfronter ce qu'il auoit escrit en 41. avec ce qu'il auoit fait collationner en 47. *Comprehensifuisse sapientes in astutia sua.* Ils ont retiré cette copie, qui eust pû suffire pour iustifier nettement comme la chose s'estoit passée, mais à la confusion dudit Naudé.

C

Le sixiesme moyen qui seul suffiroit contre ladite Relation, encore que tous les autres manquaissent, sont les qualitez que les Loix reprouuent en vn resmoin ou Historien, lesquelles se rencontrant en Naudé, le rendét incapable de creance en ce sujet. Car 1. il a trop fait esclatter sa haine cõtre Constantin en le taxant d'auoir falsifié les Manuscrits. Vn tesmoin fidelle, tel que deuoit estre Naudé, eust ingenuement & simplement déclaré auoir trouué les Manuscrits falsifiez sans passer au iugement temeraire, & a vn fait le plus noir, & vne calomnie la plus horrible, selon les sentimens & paroles mesmes de Naudé, que l'on puisse pèser. La hayne se prouue par la calomnie comme la cause par son effet, comme disent les Iuriconsultes, *Accusatorum temeritas per calumniam detegitur*; & cette calomnie n'est pas seule, mais en entraïne avec soy vn nombre infini d'autres atroces, au de la de l'excez, non seulement contre Cõstantin, mais encore contre les autres Benedictins, ainsi qu'il sera monstré cy apres en la reparatiõ d'honneur, que lesdits Peres Benedictins de la Cõgregation S. Maur demandent contre ledit Naudé, ou pour euitter les redites le lecteur est renuoyé. La 2. qualité qui exclud la Relation de Naudé, est, qu'il est tesmoin en sa propre cause. Car tous ses escrits font voir manifestement comme il est partisan desdits Chanoines Reguliers, pour soustenir ledit Thomas à Kempis estre l'Autheur desdits Liures: & partant puisque *In propria causa nemo testis audiendus est*, cette pretendue Relation doit estre comptee au nombre des fables, a laquelle on ne doit adiouster aucune foy ny y auoir aucun égard. La troisieme est que Naudé ayant fait offre par sa requeste presentee audit Lieutenant Ciuil de faire apporter les Manuscrits de Rome à ses propres frais & despens, pour verifier par l'examen d'iceux les falsifications par luy cõtees; & ne l'ayant fait non seulement dans le troisieme mois que la Cour luy auoit donné, mais mesme depuis six mois en ça, il y a grand sujet de croire que l'inscription d'iceux destruiroit le contenu en ladite Relation, autrement il n'auroit point manqué de les auoir desia fait rapporter, estant comme ils sont, en son pouuoir, puis qu'il s'est offert de les faire rapporter.

Finallement Naudé mesme est contraint d'auouer en quelque façon la faulseté de sa pretenduë Relation: car Monsieur de Launoy Docteur de Paris (assé conneu pour sa rare doctrine & probité) en la Dissertation qu'il a fait pour la deffense de Gersen, n'ayant voulu entrer dans la discussion, si lad. Relation est veritable ou non, mais l'ayât supposé pour veritable. C'est en la 2. Partie, chap. 1. Et en la 3. Partie, ch. 2. Naudé en a tellement esté picqué, qu'il a traicté ledit sieur de Launoy

avec toutes sortes d'inciuité & d'iniures, & accusé d'auoir fait vn *Iugement temeraire* touchant sa dite Relation: *Temerario de Ms. à me visis, tibi autem incognitis, Iudicio, vel itationis ipsius occasionem prabuiſti.* Au libelle qu'il a intitulé *Velitatio* 1. page 25. Ce qui fait voir qu'il estime luÿ mesme fausse sa Relation, puis qu'il s'offence que ledit sieur de Launoy l'a supposé veritable: & par consequent il faut dire que les Benedictins ont eu raison, & qu'ils n'ont point fait de *Iugement temeraire*, ains ont sainement iugé, en monstrant que la Relation de Naudé est fausse & supposee.

Tout ce que dessus posé, il resulte que les demandes dudit Naudé doiuent estre reiettees, comme friuoles; & qu'il est euident que ledit D. Robert a eu sujet de soustenir, comme il soustient encore, que s'il y a de la fausseté es Manuscrits (que non) il y a soupçon bien fondé, que ledit Naudé en est l'Authéur, & c'est en cela que consistent les iniures pretendues, dont led. Naudé demande reparation d'honneur, & pourquoy il a fait saisir les Liures dud. D. Robert & du Pere Valgræue.

Et recapitulant tout ce qui a esté dit, ledit Dom Robert est fondé. premierement sur toutes les faussetez reconnues, prouuees, & reprouuees dans la Relation de Naudé. 2. sur la haine & les calomnies qu'il a vomi contre Constantin Caietan, auquel il impute lesdites pretendues falsifications. 3. En ce que Naudé n'a point procedé iuridiquement, *Imò contra Ius ac fas*, il a vsé de subtilité: Car au lieu d'examiner les Manuscrits coniointement avec le principal examinateur en la presence dudit Cardinal, il les a emportez tout seul en sa chambre, & y a fait tout ce qu'il a voulu auparauant que Florauant les eut veus. De plus cete Relation n'estant autorisée ny par le signe dudit Cardinal, ny de Florauant, ny par acte de Notaire & tesmoins, ains l'ayant fait signer par vn tefmoin à tout faire & suspect, mesme 4. ans apres, & n'ayant esté diuulgué, que 7. ou huit ans apres la mort dudit Cardinal, & ce en autre lieu ou la chose s'est passée: d'auoir soustrait du Cartulaire desdits sieurs du Puy la coppie qu'il pretend y auoir enuoyé des 1641. & ce avec vne subtilité captieuse, se trouuant mesme ladite Relation cōtraire à l'attestation desdits Morizet & Marconius, qui ont veu les Manuscrits auparauant Naudé, sains & entiers. Que peut on inferer de tout cela, sinon que s'il y a de la fausseté esdits Manuscrits, il y a grand sujet de soupçonner Naudé en estre l'Authéur.

Quant aux autres iniures dont se plaint ledit Naudé, & qu'il cote dans son *Factum*, pour les exagerer, il a commis plus de dix faussetez en alleguant ou sa Relation, ou le liure de Dom Robert.

Dans son *Factum*, il accuse tantost trois, tantost quatre Manuscrit

de falsification : dans sa Relation il n'en calomnie que deux.

Dans son Factum il rapporte l'Ordonnance du Cardinal Baigne , touchant la procedure à l'examen des Manuscrits , autrement que dans sa Relation.

Dans son Factum, il passe sous silence qu'il emporta & tint tout seul les Manuscrits en sa chambre contre l'Ordre du Cardinal.

Dans son Factum, il a fait plus de six fausses allegations , en rapportant les paroles dudit Dom Robert ; afin que les tronquant à sa fantaisie , il eust pretexte pour publier ses plaintes desraisonnables, vsant souuent de &c. comme si ce Medecin pouuoit à force d'Apo- tomie, & de &c. faire perir nos Antidotes.

Il se plaint encore dudit Dom Robert, qu'il a appelé sa Relation, *Fabula, Narratiuncula, Commentum.*

2. De ce qu'il a dit que Galeot estoit son familier, qu'il a signé sa Relation 4. ans apres qu'elle a esté faite, ce qu'il n'a appris que de Naudé.

3. De ce qu'il a dit que Florauant n'a pas fait comme luy : luy fait on tort de dire qu'un autre n'a pas esté si prompt a la colornie que luy ?

4. De ce qu'il a dit *Florauantes miratus est hominum nequitiam* : s'il y eschet reparation d'honneur , il faut que Naudé la fasse luy mesme , car ce sont ses propres termes dont il se sert dans sa propre Relation contre Caietan.

5. De ce qu'il a dit vne chose qui redonde à sa loüange , à scauoir que Naudé possédant vn Prieuré de l'ordre de S. Augustin, il n'y a de merueille qu'il tasche de rendre quelque seruice à ce mesme Ordre.

6. Quaud a ce qu'il a dit que, peut estre auoit il falsifié les Manuscrits avec quelque poudre medicinale ; puis qu'il est euident que le soubçon de falsification tombe sur Naudé, qu'importe qu'il les ayt falsifiez avec poudre , ou autre chose ?

Et voila les plus poignantes & pressantes iniures que Naudé pretend auoir esté dittes contre luy.

Après auoir monstré combien ledit Naudé se trouue mal fondé en sa demande, il reste à faire voir comment lesdits Dom Placide Roussel & Dom Robert Quatremaire, & les Peres Benedictins de ladite Congregation Saint Maur, sont bien fondez en la reparation d'honneur, qu'ils demandent contre ledit Naudé, pour les calomnies & iniures par luy proferées contre le R. P. Constantin Abbé de l'Ordre Saint Benoist, & contre tout l'Ordre.

Ledit Cōstantin Abbé Prestre, Cōmensal, & Antiquaire de plusieurs Papes , desquels & des Cardinaux, il a receu tant de beaux Eloges pour sa pieté & erudition, laquelle a esté recōnuë par les plus sçauans de son

son siecle, quil'ont cité en leurs doctes escrits, comme le Cardinal Baronius, le Cardinal Bellarmin, Suarez, Posseuin, Arnauld Wion, Gauantus, Gretserus, Salas, Wadingus, Besald, Ghislerius, Victorellus, Vghellus, Bzouuius, & plus de vingt autres, & particulièrement Leone Allatio, qui a fait vn ample Catalogue d'un grand nombre d'excellens ouurages, par lesquels ledit Constantin a beaucoup merité & de l'Eglise, & des lettres,

Voicy donc les Antiteffes des Eloges donnez à Constantin par les Papes & Cardinaux, & les iniures proferez contre luy par Naudé.

CLEMENT VIII. Studio bene merendi de Republica Christiana & Apostolica Sede, *Par vn dessein particulier d'obliger toute la Republique Chrestienne, & le S. Siege Apostolique, a fait venir Constantin à Rome.*

PAVL V. Laudabilis opera. *Son travail est digne de louange.*

PAVL V. Laudabilis labor. *Ses œuvres meritent d'estre estimez.*

PAVL V. Laudabilis diligentia. *Ses soins doiuent estre en veneration.*

PAVL V. Doctæ lucubrationes. *Ses ouurages sont remplis de doctrine.*

PAVL V. Pieux & docte.

GREGOIRE XV. Familiaris & continuus Commensalis noster. *Nostre domestique & ordinaire Commensal.*

GREGOIRE XV. Sanctum imprimis & laudabile Constantini propositū, &c. *Les Saints & louables desseins de Constantin Caietan.*

NAVDE. Si non aliqua nocuisset, mortuus esset. *S'il ne continuoit à faire mal, il ne seroit plus en vie.*

NAVDE'. Fraudulentus. *Trompeur.*

NAVDE'. Epeus. Nugax. *Coriphee des trompeurs. Vn donneur de bourdes.*

NAVDE. Imposteur.

NAVDE'. Rassoté.

NAVDE'. Fol, enragé a medire de tout le monde.

NAVDE'. Faussaire.

NAVDE'. Summè nequam. *Souuerainement meschant.*

GREGOIRE XV. In gratiâ laborum, &c. vt peculiari prærogatiua se cohonestatum lætetur, &c. *Afin que par vne reconnoissance de ses trauaux &c. Et estant honoré de moy par des graces particulieres, il ait suiet de s'ejour & continuer, &c.*

LE CARDINAL BARONIVS. Magno & indefesso studio laborat. *Il estude avec vn grand & infatigable travail.*

LE CARDINAL BARONIVS. In vindicandis in lucem antiquitatibus fructuosè laborat. *Il travaille très utilement pour mettre en lumiere les Anciens Auteurs.*

LE CARDINAL BELLARMIN, & les autres que i'ay nommez cy dessus, citent Constantin comme vn hõme docte & tres digne de creance.

Il calomnie encore Constantin d'auoir falsifié les Manuscrits de question. Dit que c'est vn homme sans iugement ny conscience, qui ne fait qu'escrire tous les iours mille refueries, qu'il a des inclinations estranges non seulement à persuader toutes sortes de fables, mais encore à corrompre toutes sortes de liures, qu'on ne l'a iamais connu dans Rome que pour vn cerueau chimerique; & follement interessé pour les prerogatiues de son Ordre: & enfin Naudé à vomy vne iniure, qui surpasse toutes les autres (ce que ie remarque avec honte & regret) il appelle Caietan *Rabougry*, laquelle seule merite punition exemplaire.

Voila comme Naudé prend la licence de dire impunement d'vn homme loué de tous les gens de bien, d'vn Religieux, d'vn Prestre, d'vn Abbé, tout ce que le plus medisant pourroit declamer contre vn Heretique, où vn Demon.

Il ne faut point perdre temps a declarer la griuete de toutes ces calomnies de Naudé, puis qu'elle paroist assez par les glorieux Eloges donnez audit Constantin. Mais Naudé se rend encore plus iniurieux par les preuues sur lesquelles ils appuie ces monstrueux colosses d'infamie.

NAVDE'. Summe impudens. *Souuerainement impudent.*

NAVDE'. Ad fraudes & technas natus. *Qui n'est au monde que pour fourber & tromper.*

NAVDE'. Sus deque veritatem & conscientia habet. *Il a en horreur la verité & la bõne cõscience*
NAVDE', *Plus grand fourbe qui soit en Italie.*

L'une des preuues est, que Constantin a dit que Sainct Gregoire le Grand estoit de l'Ordre de sainct Benoit.

L'autre qu'il a falsifié les Manuscrits dont est question.

Quant à la premiere Naudé ne la pouuoit proposer sans monstrier son ignorance, ou sa trop grande affection à médire: Car quand bien Constantin auroit erré en ce point (ce qui n'est pas) faudroit-il tenir vn homme sans verité & conscience pour s'estre trompé en l'Histoire? Prend-on Baronius comme vn homme sans foy pour auoir pris Basas au lieu de Vaisson? Mais sans parler de sainct Augustin, de sainct Ambroise & d'autres, ce docteur Naudé qui s'est luy mesme conté entre les brillantes lumieres de ce siecle, n'a t'il pas remply (sans parler de ses autres libelles) son Dialogue de tant d'erreurs & impertinences, qu'il a esté contrainct de le supprimer; a t'on pour cela pris occasion de le diffamer?

Naudé passe outre & dit que Constantin a des inclinations estranges pour corrompre toutes sortes de Liures, & baille pour exemple la falsification pretendue des Manuscrits en question, disant qu'il peut tirer parallele de Constantin avec vn certain Medecin faussaire nommé Cicarelli, qu'on fit mourir pour ses crimes du temps de Gregoire XIII. On void de là comme Naudé suppose veritable cette fausseté qu'il impose à Constantin, & fait dauantage, car sans en auoir rien prouué, il en induit vne inclination estrange de Constantin, pour corrompre toutes sortes de Liures, sans en pouuoir specifier aucun, & la dessus le condamne à la mort. Dauantage le torrent de ses medisances ne s'arreste pas à Constantin seul, mais se deborde encore sur tout l'Ordre Benedictin: Voicy ce qu'il en dit en son Factum.

Page 5. Le crime dont ils sont accusez est grandement honteux principalement à des personnes de leur Ordre.

La mesme, il les accuse d'auoir falsifié trois Manuscrits, & deux instrumens de Notaires.

Page 6. Que les Benedictins sont capables des faussetez pretendues

Page 14. Cabale des Benedictins.

Page 15. Pure fable, imagination creuse & ridicule.

Page 18. Que les faussetez ne leurs sont que jeu, pour ce que peut-estre leurs sont elles ordinaires.

Page 22. Faussetez que ces bons Peres ont eux mesmes commises.

La mesme, Ils n'ont point de conscience de flestrir l'honneur de Naudé.

La mesme, la medisance de tous les Benedictins reformez.

La mesme, fourberies commises & auctorisees par eux.

Page 23. *Lauerna Claustra.*

Page 24. Benedictins reformez, mais aussi peu consciencieux en France qu'en Italie.

Dans ce mesme Factum, il fait des comparaisons iniurieuses des Benedictins avec les Ministres, avec Ruffin, Guillaume Postel, & autres heretiques impertinens. Il les taxe de ces mots, *temeritas & insania*, desquels saint Ierosme s'est seruy contre Ruffin.

Depuis peu de iours il a fait courir vn libelle, qui peut estre pris pour vn patron de medisance, ou entre autres infamies qu'il vomit contre les Benedictins dans ce libelle page 19. Le R. P. Valgraue pour auoir impugné Thomas de Kempis en cette question qui s'agite maintenant est attaqué de ces paroles, *flagitium dirum & immane Valgrauij cuiusdam, bipedum ineptissimi.* & vn peu apres, *Hic enim ut ex genio sui Ordinis mendaciorum loquacissimus est.*

Et pour représenter briefuement les iniures qui se lisent en ce libelle, & dans vn autre encore mis au iour du depuis, voicy les termes dont il vse.

Benedictinorum flagitia, sycphantia, iudicij penuria, mentis cecitas, ineptia, garrulitas, triuiales nuga, verè improbi labores, peruicacia, fatua ac ridicula ratiocinationes, trica, cauillationes, titiuitia, mala artes, impostura,

Mss. Romanis obeorum manifestam falsitatem nihil turpius, & religiosior viris indignius.

Non eo vergit argumentum istud ut aliqua bona mentis fiat accessio Patribus Benedictinis, tam praefractè veritatem ipsam inficiari Solitis quam cacus negat videri sibi Sole pleno meridie.

Sont la les fleurs desquelles Naudé a tissé la couronne des Benedictins, promettant encore d'en adiouster bien d'autres, par diuers libelles, dont il les menace, non pour auoir commis autre crime sinon que pour auoir montré par des raisons, aux quelles tous les Doctes non passionnez se rendent, que Thomas de Kempis n'est point auteur du Livre de IMITATIONE CHRISTI, mais que c'est Iean Gersen Abbé Benedictin.

Oriaçoit que les seruiteurs de Dieu soient ainsi ordinairement maltraitez des hommes, cōme là esté Abel par Cain, Isaac par Ismael, le Fils de Dieu par les Pharisiens, S. Benoist par vn calomniateur nommé Florentius, si est ce que les Loix ont tousiours reprimé les efforts trop violens de ceux qui ont outragé les personnes consacrez à Dieu, comme il arriva autre fois a vn certain Guillot, duquel les Liures composez contre les Ordres de Saint Dominique & Saint François, furent bruslez publiquement par Arrest du Parlement de Paris.

Et pour opposer a toutes ces calomnies, la Cour considerera s'il luy plaist.

1. Les merites del'Ordre Benedictin enuers toute l'Eglise, & tous les Estats.
 2. L'estime en laquelle a esté Constantin Caietan aupres des Papes, & des hommes les plus illustres de son temps.
 3. Les iniures & les calomnies dont Naudé rasche de flestrir l'honneur dudit Constantin, & des autres Benedictins.
 4. Le dessein de Naudé en cecy, qui est de rair a l'Ordre Benedictin l'Auteur du Liure dont est question, en ruinant la reputation de ceux qui le deffendent.
 5. La suite de ces libelles de Naudé, car puisque certaines personnes qui font particuliere profession de pieté, par vn zele trop ardent, ont bien pris occasion des libelles dudit Naudé pour proferer contre les Benedictins & ledit Constantin, des paroles qui ne doiuent iamais sortir ny de leur bouche ny de leur plume, que ne ferôt ceux, qui pour l'antipathie du mal avec le bien, ne cherchent qu'a diffamer les Religieux, lesquels employent leur trauaux pour le seruice & salut du public.
 6. Que Naudé n'a aucune preuve de tout ce qu'il dit.
 7. Que ledit D. Robert na respondu qu'avec bonnes raisons.
 8. Que Naudé par ses mesmes demandes s'est luy mesme condamné. Car si pour auoir dit que sa Relation est fausse, & l'auoir prouué ainsi que nous auons fait; si encore pour auoir escrit en allegant de fortes raisons, que supposé qu'il y eust de la falsification és Manuscrits, il y a grand soupçon que c'est luy qu'il l'a commise. Si pour cela disie il demande reparation de son honneur, que ne faut il exiger de ce luy, qui a mis en auant que lesdits Manuscrits sont falsifiez sans en auoir apporté de preuve; qui en suite a dit absolument sans restriction, sans preuve ny coniecture, que les Benedictins sont auteurs de telle falsification, & qui a proferé toutes les autres iniures cy dessus énoncées tant contre ledit Caietan, que contre tout ledit Ordre Benedictin, quelle punition ne merite point vn tel homme, afin que les mauuais soient empeschez par la terreur de la peine, & que les gens de bien loient Dieu pour la protection de leur innocence?
- Par ce moyen & autres qu'il plaira à la Cour, par sa prudence ordinaire, supplier de droit & equité, concluent lesdits D. Placide & D. Robert, a ce que la saisie faite du Liure composé par ledit D. Robert, soit declaree iniurieuse, desraisonnable & tortionnaire, que mainleuee par Iugement luy en sera faite avec reparation, dommages, inte-

rest & despens; & lesdits Benedictins de la Congregation S. Maur, à ce que faisant droit sur leur interuention, il plaise à ladite Cour ordonner, que tous les mauuais discours & paroles iniurieuses contenus & portez par lesdites Relation, lettres adressees au Pere Fronteau Chanoine regulier, imprimee & mise à la teste de la derniere Apologie faite par ledit Fronteau, Factum & escrit dudit Naudé contre lesdits Abbé Caietan & Ordre Saint Benoist, seront supprimées rayez & biffez desdits Liures, faire deffence audit Naudé de plus tenir de semblables discours, & de plus escrire de telles impostures, contre l'honneur & reputation desdits Benedictins, à peine de trois cens liures d'amende, aplicable au pain des prisonniers de la Conciergerie, & que pour l'auoir faict il soit condamné en telle reparation qu'il plaira à la Cour ordonner & en tous les despens dommages & interests.